

113 年全國語文競賽原住民族語朗讀 【拉阿魯哇語】 國中學生組 編號 3 號

pihlingiku

ma rərərmanə saliaku, marua cacihli ama'a tamuucu macahlia  
tumahlisusulu. marua cacihli ina'a, tamuucu tumatuturu hla  
apasamanganə ihlaku.  
tam langəlangəa amakuna taku'i'iarə, pi aatə utulu ari  
muangahlə puaili. piamacu, maci uka'a salia kana'ana ia tamuucu saliana  
masəməta. ucaniika ta'iarana sapara ualava siangusipa, micəcəcəngəhlə,  
pasamanganə aucaucani ta'iarana, kutarakakukua ta'iarə mamaini,  
karəkəhləa kana'ana pakiaturu siangusipia hlicalivana, tumuruturu ihlaku  
aunini umahlikua cucu'u, karəkəhləmana kana'ana kiahlahlamu  
sitahliasusulua karina, tumahlisasangarə ihlaku hla ina'ana. macuaku pi  
takuliacə təkə ia, tumatamahləngə kari sitahliasasangarə ihlaku. tamuucua  
kana'ana tama'iarə, ta'iarə məməa ia takacicihliisa taku'i'iarə, ucaniika,  
marumana maci pasasavasavaə, miungucua taluavaəlanə ari rumahləə,  
makahlualavaəa kana'ana usia pakiaturua hlamasə iniciki  
umacəka, ahli'aimau apatakuamə'aumana ihlahlamu. kuhlaisai amakuna  
tamuucu macahlia tumahlisusulu, tamuucu tama'iarə hla masavaə.

inaku naia ihlaisa cacihli mahlauau salia, ariaria kana'ana marapihli  
maipuhlipuhli liliunga salia, avavu camai hla hlumahlavu tikuru,  
rianə kana'ana kiacicihli taku'i'iarə, kuna kiahlahlamua kana'ana  
takuapulapulatu, rianə tama'iarə takuamia ta'iarana, mataingələ macalai  
ihlaku, macalai ihlaku siaiapa hla pahlumiamia siaiapəna, siatuturuisa  
tamuucu tumamacu hla marucakə, kani'i siaricacanina tamuucu hliulavalava  
kana'ana, kuhlaisai, pakiapuhlua kana'ana matumuhlu siaiapa,  
karəkəhlə tumatuturu ihlaku macuisa sitahlamiamia, tumua apapapuhla  
hliaracahliaku. ma kani'i siangusipakuna rianə pi sitakuamacua, kuhlaisai,  
tumatuturua kana'ana ihlaku langəlangə sitakuamia. takuliacə vahliciisa,  
kukiahlahlamu misaini alalualunguhla, ucaniika tuahləa kana'ana pahluaili  
tikiku, kuhlaisai, karəkəhləamu arupakakari, musa pautuhlangi  
hlipasapukia. kani'ina ia ihlaisa inaku, tammarucakə hla tam macalai ihlaku.  
kani'ina ia saliaku, tam mavacangə hla arupaliaələləsə salia.

## 我的家庭

在我家裡，有一個非常幽默的爸爸，有一個關心我、教育我的媽媽，還有一個活潑可愛的我。

我爸爸的工作很辛苦，每隔三天才回來一次，說實話，他不在家時，家裡總缺少一份歡樂的笑聲，但他認真對待每一份工作。從來不計較一些小事，他常常用生活的例子來教育我做人，也常用笑話來逗我和媽媽開心。他還非常勤勞，什麼事都是他搶在前面，可是他有些時候又非常懶，每到星期天他都會睡得晚。所以我爸爸是一個幽默、勤勞而又懶的人。

我媽媽是一名家庭主婦，但她從來不嫌累，還特別關心我。作業和書寫方面都嚴格要求，數學是她的強項，總是給我出一些數學題，還常常教我那些複雜數學練習方法，讓我擴充知識。她覺得對我一生都有用，才用這些難度大的知識讓我進行訓練。她的脾氣很大，動不動就發火，但是她能體會到我是怎樣的心情，所以我們常常溝通，來發現對方的不足。這就是我媽媽，嚴格又關心我的人。

這就是我的家，溫馨而和睦的家。